

四庫全書

集部

欽定四庫全書

集部

于湖集卷二十六至

詳校官起居注主事臣顧宗泰

主事臣呂雲棟覆勘

總校官知縣臣楊懋珩

校對官編修臣章宗瀛

謄錄監生臣黃楷

欽定四庫全書

于湖集卷二十二

宋 張孝祥 撰

啓

除禮部郎官謝沈左相

考東觀之藝文方陪雋軌隸尚書之牋奏遽列清曹荷  
銓宰之殊知躡官爨而超授伏念某幼而不學長也益  
愚出寒鄉寂寞之濱居游已陋襲老生陳腐之說剽略

奚工策名雖冒於一科觸禍僅違於九殞諸侯賓客姑  
將稍試於所聞上帝圖書即許竊窺於未見牙籤雲委  
貝闕天橫蠹魚枯文字之間海鳥眩鼓鍾之饗瓶罌易  
耻宜蒙盥脫之譏組繡非能敢望錦窠之目始令承乏  
旋使爲真訪臺閣之大儀顧非博綜誦朝廷之故事尤  
愧清通蓋一再歲之久虛乃不崇朝而輕畀凌兢就職  
激切懷恩茲蓋伏遇僕射相公道妙體元誠純育物皋  
夔稷契丕成極治之功東馬嚴徐盡入至公之用占小

善者率以錄示大賢之無不容猥收場屋之虛名亦玷  
省垣之高選某敢不靖共爾位紬繹舊聞何自為郎雖  
賴曲成於造命不遑將父終期外補以便親

湯右相

上前 某重惟父子悉累門闌樞筦編摩墮甑尚勞於却

顧珍臺洒掃逸枝更許於安棲藐是孤蹤益勤大造斯  
文衡鑑收雕蟲篆刻之微羣枉織羅救破卵傾巢之酷  
故茲識擢一出異知恩如鞠育以何加身欲糜捐而莫

報某敢不質之天地銘在肺肝

下同前

謝劉提舉

郎家安在方叨執戟之榮君舉必書遽陪載筆之侍冒  
恩至渥論報獨難伏念某猥以諸生濫追衆雋考藝文  
於東觀隸牋奏於南宮忽誤聽聞進躋班列典春秋尚  
書之簡冊何有編摩望清都太微之冕旒空塵供奉靡  
容辭避端自吹噓茲蓋伏遇某官學有本原智周事物  
六轡按部式專開闔之權三接造庭即賜清閑之燕不

遺故舊曲借褒揚遠勤騎吏之臨特拜雲牋之貺齊夸  
烏有姑借喻於騁辭魯懼無鳩願推誠於發藥祗深感  
忭莫既頌言

撫州到任謝執政

殊庭賦祿方省已以偷安劇郡分符遽叨榮而起廢大  
恩難報小器易盈伏念某天與隘疎地繇孤遠頃陪朝  
列誤簡聖知執筆螭坳愧編摩之何有演綸鳳閣知潤  
色之非長人咸美於遭逢已獨知其僥倖彈黜驢之技

未答洪私致鵜梁之譏莫逃餘責一收朝蹟三易歲華  
既自循滿溢之愆最復有超踰之望忽玷蕃宣之寄實  
繫造化之私恭惟某官茂業經邦精忠格帝自任天下  
之重出應聖人之時端委廟堂共建非常之策運籌帷  
幄果收不戰之功勲在旂常望隆鼎鉉夫何踈拙亦預  
搜揚某敢不祇畏簡書布宣條教慰安牧養冀追渤海  
之功撫字催科惟上道州之考

王提舉



食檠飲冰舊欽耆德匿瑕藏垢今藉餘輝將親依繡節  
之嚴敢恭致緹緘之問伏惟某官學專師古志不謀身  
落木紛披凜長松之獨立頽波浩渺屹砥柱於中流蓋  
富貴一時於我何有哉雖夷險百為惟是而已矣聖天  
子既深知於忠讜士大夫亦交譽於清規正色朝端所  
宜進陟觀風江介曷尚淹留某慕用惟深師承是幸惟  
州縣簿書之事儻少寬程督之科則里閭凋瘵之民庶  
竭盡撫摩之力

陳運使

誦諫臣之薦草夙欽循吏之稱分太守之竹符今托外  
臺之比願瞻誨色祇奉教條恭惟某官古學精深英猷  
特達頃侍和公之側屢道永州之賢事得其宜未嘗干  
百姓之譽治出於一殆無愧兩者之間將登禁密之聯  
尚借澄清之略諒無煖席即有賜環某慕用惟勤親依  
是幸惟州縣簿書之事儻少寬程督之科則里閭凋瘵  
之民願竭盡撫摩之力

任提刑

近仙闡錦帳之氎昔聯輝於列宿瞻使者繡衣之斧今  
托此於二天將祇奉於教條敢敬馳於書牘伏惟某官  
學潛精粹德秉純全素節清規表儀於鄉黨閎猷敏識  
潤色於朝廷容臺正絕禮之訛憲府極繩愆之效方佇  
持荷之拜俄聞蕩節之行千里上游久著平反之譽九  
闕帝所即期趣召之歸某一去賓閣屢更歲籥躬耕下  
澤徒切睇於光躔假守偏州乃密依於蔭樾所冀少寬

於程督庶將自力於撫摩

黃運使

一麾江海叨被恩書千里湖山遙瞻使節方有希於餘  
潤乃先辱於惠音共惟某官德履粹溫才猷開濟早更  
名郡偉望實之魚隆暫屈外臺見事功之咸允雖經畫  
雅資於管葛而論思正屬於嚴徐佇奏嘉庸即還近列  
侍紆高誼曲賁踈蹤把酒分一日之光坐歎晤言之阻  
占詞妙五雲之體但深藏棄之榮

鄭大資

綠章封事方修香火之緣黃紙除書忽拜璽絲之托愧  
微蹤之未稱幸長者之焉依伏惟某官德秉純全學躋  
淵奧五百年之名世將以有為四十圍之參天凜乎不  
拔歷數當今之大老孰是中原之故家願益介於壽祺  
佇登延於舊弼某服膺滋久望履終遙何期起廢之恩  
乃有親仁之幸惟諸父辱少公之客未報隆私顧是邦  
有賢者之留敢忘祇事歸依之極敷宣奚周

陳正字

同前  
伏惟某官學造聖真文為國采瓊琚玉佩久應接  
武於夔龍貝闕珠宮尚困守關之虎豹所冀躬行於白  
屋會須自致於青雲某屬遙英躔繆參朝契念辱在游  
從之舊間者闊焉乃今諧親炙之榮喜可知也未遑問  
訊先辱移書

提幹

同前  
伏惟某官襟量粹夷才猷超敏外臺贊畫知譽處

之采休要路蜚聲諒東求之不遠再惟冗瑣獲際光塵  
友士之仁豈獨慰平生之願求民之瘼庶將聞忠告之  
規

建昌趙知府

同前  
伏惟某官擢秀天支蜚聲朝右為善最樂卓然循  
吏之師閱理居多粹乎宗室之老暫淹侯服行陟禁涂  
某慕義已深承顏弗遠是所願也儻或聞前輩之話言  
豈不然哉當盡得疲民之疾苦

黃知府

同前 伏惟某官正學探微英猷邁遠風流未泯蓋山谷  
老人之諸孫進擢非遙有袁州刺史之故事諒不容於  
煖席即適被於賜環某 同前

孫參議

同前 伏惟某官與學家傳宏猷天賦名藩布詔謂當少  
著於豐功燕館願真乃復重違於雅志惟益臻於壽祉  
以茂對於榮恩某久此睽違載欣接款 同前



王教授

同前  
伏惟某官學造淵微才推敏劭橫經師幄知譽處  
之衆休奉詔公車諒東求之弗遠再惟冗瑣早際光塵  
未遑問訊之恭先辱貽書之貺

通判以下

同前  
伏惟某官襟量粹夷才猷超敏回翔外服知譽處  
之衆休踔厲要塗諒東求之不遠再惟冗瑣獲際光塵  
友士之仁豈特慰平生之願求民之瘼庶將聞忠告之

規

趙通判

殊庭賦祿方竊便安支郡分符誤叨委寄所幸治中之  
從事乃是平生之故人伏惟某官清德家傳英猷天賦  
光風霽月自是無塵錯節盤根試窺游刃雖千里尚留  
於驥足然九霄方迅於鵬程諒亟拜於除書遂橫蹇於  
顯路某屬因諸父嘗際高賢間者闊焉已忘歲月之多  
少喜可知也願將朝夕以親依未皇問訊之恭先辱貽

書之寵

江州林知府

半生慕義未遑賓謁之修文郡承流遂有善鄰之託載  
馳書牘恭掣齋鈴伏惟某官敏識造微英猷邁往卓然  
一代之循吏喜是中原之故家坐嘯江城仰治功之獨  
最奉朝漢闕諒追詔之非遙曾是微蹤將依隆范寒女  
緝亭所願分光於有餘拙匠伐柯尚欣取則之不遠

留太尉

授將軍之鉞嘗望餘光分刺史之符遂依隆圯伏惟某  
官忠揭日月義嚴雪霜早歲臨戎即登於勇爵十年扈  
蹕屢勒於勲銘建邊瓊之多虞由殿巖而遣戍茂宣皇  
略亟挫天驕倚須露布之聞遙正節旄之拜顧茲孱瑣  
方藉帡幪瞻碧幕之非遙馳尺書而敢後

王侍郎

緯星辰之轡轡斯文夙賴於主盟卧江海之空同舊德  
更高於耆壽喜問塗之有日將候館以趨風恭惟某官

名冠倫魁識參元妙瓊琚玉佩固嘗接武於夔龍貝闕  
珠宮屢困守關之虎豹去六月而一息翔千仞以覽輝  
諒扶施之北來即賜環而南下某粵從稚齒聳慕雋躔  
何期荒障之乘適此高軒之過紫光下燭華問先臨仰  
君子之好譙愧小人之不敏

明州韓尚書

繡幢畫戟占東藩鼓角之雄寶字王文新廣內圖書之  
直入謁尚遙於賓榻修辭敢後於齋鈴伏惟某官粹量

淵停英姿玉立學無不可凜乎當代之偉人政得其宜  
卓爾中興之循吏乙陞識尚書之履四方勞申伯之藩  
留鑰九扉已壯長江之險戈船下瀨還清瀚海之波願  
疇外屏之勲遂贊西樞之畫某逖違墻仞多閱歲時大  
司寇之議刑嘗拜家庭之賜小諸侯之迷職敢忘方伯  
之尊嗟問訊以成踈且懷恩而未報所蘄宏度終諒微  
誠律管崢嶸和門整暇冀益綏於純嘏亟趨覲於嚴宸

曹監簿

一麾假守自愧非才千里貽書過勤盛意伏惟某官英  
聲夙著德器自將雍容文辭亟簡朝廷之聽積習名教  
益增閎闊之光方徑席於清高尚不忘於疇昔有懷謙  
眷莫喻鄙悰

賀周侍郎

寵闕

洊膺異數以武部之顯曹而顯玉堂之直以  
文林之魁傑而紬金匱之書外廷雖創見於親除造膝  
乃先期於面授共惟聖眷獨厚諸公蓋將基大用於此

時豈曰踵前人之故事有如孤迹辱在恩門竊欣廣厦之成密仰慶雲之蔭輒因尺牘少薦愚衷

于湖集卷二十二



欽定四庫全書

于湖集卷二十三

宋 張孝祥 撰

啓

王提刑

汝水承流已叨覆露吳門易地更托按臨繫幸會之適  
然知譴訶之可免伏惟某官純誠獨秉剛毅不回溜雨  
之四十圍本孤根之自立搏風之九萬里寧短翼之爭

飛粹無悃悞之華凜有澄清之志顧外庸之久訖宜中  
詔以遙歸某別德經時親仁不日疇昔熟於條教莫先  
圖民俗之安乃今奉以周旋當益厲官常之守

章提舉

虞廷輯瑞昔叨一盼之榮禹甸宣風今與六條之按仰  
止使旄之近俯馳書牘之恭伏惟某官粹量淵傳英姿  
山立文高學古蔚為儒掖之宗行峻履方屹此廷紳之  
表自寵持於華節即妙東於垂旒外庸已訖於澄清中

詔行參於宥密某見賢不遠受察云初是能容之儻少  
寬威於程督庶乎可耳所當盡力於撫摩

兩通判

諸公長者之譽疇昔固願見之同官為察之賢乃今何  
其幸也伏惟某官英猷邁往正學探微杞梓梗楠知鄧  
林之不雜琮璫圭璧宜清廟之見收暨淹半刺之除行  
拜十行之寵某依仁匪遠託契云初前事後師儻志蒙  
於教告左提右挈其將免於悔尤公其圖之我所願也

知州

門闌睽隔久違問訊之恭

不相識云門闌在郵傳鼎來望未諧識面之私

遽被貽書之寵仰佩沖虛之懷更懷親附之榮伏惟某  
官行峻履方識明器博籍甚諸公之譽當立上於要津  
居然一障之乘顧何勞于餘刃諒賜環之在即遂持索  
以居中某已試無功丐閑得劇民亦勞止冀少圖安集  
之功公儻教之當謹承清淨之誨

待闕通判

上同 伏惟某官行峻履方識明器博籍甚諸公之譽當

立上於要津居然別乘之官顧何勞於餘刃諒賜環之

在即遂結綬以邁歸

下同前

### 趙郎中

上同 伏惟某官行峻履方識明器博籍甚諸公之譽當

立上於要津退然三徑之居乃深藏於偉業諒璽封之

來下由珍館以邁歸

下同前

### 王提幹

前上同

伏惟某官行峻履方識明器博西樞宥密夙推家

闕

之謀右輔均輸今賴幕中之畫佇趨嚴召立據要津

前下同

朱知府

前上同

伏惟某官行峻履方識明器博楚都揭節夙高廉

按之公嚴瀨剖符行著蕃宣之績恐難淹於外服當即

拜於中除

前下同

胡國正

籍甚諸公之譽所願納交粲然一紙之書胡為及我伏  
惟某官高文足以華國竑論足以濟時璧水之除此其  
漸耳瑣闥之拜衆且遲之方消搖於里居益涵泳於聖  
學俯慚固陋行際聲光友士之仁豈獨慰平生之願求  
民之瘼庶將聞忠告之規

陳教授

同年之契契闊有時為僚之賢邂逅於此伏惟某官議  
論該乎國體文華贍於時英教諸侯之泮宮聊從容以

卒歲備天子之詞命知軒騰之有時某攝官云初依仁是幸友多聞之益無以尚之問為政之方其知免矣

常州郭知府

諸父納交昔叨末契近藩假守今託善隣將敬掣於齋鈴敢遠馳於書牘伏惟某官才高盤錯譽滿薦紳諫大夫薦之公朝太上皇擢以名郡第循良之最獨居三輔之先輸獻替之忠即參兩禁之密某已無善狀更誤厖恩望廬山之雲既闕晨昏之養飲吳江之水敢為旬月



之圖欣近接於封圻將悲摹於條教僕之所願如此公  
其勿愛於言

撫州陳知府

碩膚之譽久屬厭於舊聞斗大之州乃淹翔於敏手豈  
獨託交承之契所欣蒙覆護之私伏惟某官器業偉然  
聲華籍甚家學之富盖有本原吏事之精尤高盤錯暫  
領一麾之寄即嚴三節之歸乃眷臨川號稱古郡戶乏  
中人之產府無經月之儲貧吏乾沒既不哀杼柚之空

齊民無聊皆去為囊橐之盜宜有循良之政來蘇疲瘵之餘愚若孝祥一無可紀糠粃在前之愧夫何言哉瑾瑜匿瑕之仁是所望也

劉舍人

五筦曠官已這黜幽之典三湘謀帥又叨使過之恩竄惟衣鉢之傳實有鈞陶之自某奉身無術與世全疎冥行於利害之涂窘處乎讒謗之數載從去國屢遣作州率以五六月之間則為數千里之役精神耗於憂畏筋

力疲於奔馳忽去忽來固未免揶揄之鬼乍賢乍佞獨奈何萋斐之人豈無二頃之可耕況復雙親之既老決意投簪之適弗圖賜履之榮恭命而行懷辭不獲茲蓋伏遇某官學窮聖蘊道覺民先羞崑崙薄蓬萊迥立風塵之表決汝漢排淮泗橫馳翰墨之場比收一笑之功遂殄陸梁之寇雖在公以為餘事然寬上之所甚憂肆予環而召歸當告冊而爰立即以所臨之巨屏付之承學之諸生某敢不謹守箴規益思策勵老吾老幼吾幼

方深靳錫類之恩步亦步趨亦趨終難望絕塵之軌

王運使

劾章亟上即使歸田明詔趣行又令分閫蓋亦東西之  
惟命敢云來往之為勞所欣容察之賢乃是交游之善  
伏惟某官英姿煥越德宇靜深風流傳正始之餘人物  
尚中原之舊刻清湘之樂石嘗夷赤籍之驕通下瀨之  
戈舡又靜綠林之擾佇圖成績即拜顯除某猥奉藩條  
獲依使節念問涂衡嶽曾分筆硯之餘而枉駕湘西復

接孟觴之勝違離屬爾際會偶然一馬二童長驅千里  
雙魚尺素疊拜三緘筋力盡於奔馳精神為之耗散欲  
報所貺將遣復休念已投契分之深豈其較禮文之末  
我之不敏情見乎詞

寄居官

勅章亟上即使歸田明詔趣行又令分閭蓋亦東西之  
惟命敢云來往之為勞一馬二童長驅遠道雙魚尺素  
敬拜好音病體困於奔馳文思為之枯涸涉筆欲報空

函是憂念方依德庇之初管下倅云念方託僚契之深必不較禮文之末我之不敏情見乎詞

呂彥升到狀

出分宮鑰繆託交承入奉介圭喜將邂逅聞有南徐之新命復為北道之主人幸艤舟而小留當接塵而一笑帥江陵通運使楊顯謨

山川跋涉欲徧東南父子扶攜復來荆楚即有依仁之幸更懷冒寵之慚伏惟某官熏班馬之濃香鍾岷峨之

秀氣籍甚之譽與江俱流爛然之光立朝更顯謂當扣  
紫微而排閭闔徑拜玉清之侍臣何謂羞崑崙而薄蓬  
萊尚作繡衣之使者有如孤迹嘗並英遊乃今邊瑣之  
行復託外臺之底夕烽罷警請與公圖綏靜之宜春水  
才生冀許僕辦歸休之計

蕪湖沈知縣

籍甚之譽久矣在諸公之間最爾之邦豈其淹長者之  
辱伏惟某官文章翰墨自成一家人物風流尚友前輩

少借演綸之手來收製錦之功顧游刃之有餘諒追鋒  
之不遠未皇馳牘先辱貽書

于湖集卷二十三



欽定四庫全書

于湖集卷二十四

宋 張孝祥 撰

書

代總得居士上沈相該

厥今天下之士彈冠結綬請以身售於相國之門者不知幾何人其聰明才智崇論宏議足以理紛濟劇謀王而斷國者又不知幾何人若是者相國之門蓋已不乏

於才而碌碌尋常之人亦無以自達於下執事矣雖然  
相國豈直以此而遂拒天下之士也哉周旋慰薦惟恐  
其不至士之客於中都者今日投謁于司賓之吏明日  
則命之見焉其善惡能否相國蓋一與語而盡知之如  
燭照數計毫髮無以自隱於是而退絀於是而獎用則  
公議翕然咸以為當或以問某曰相國午漏下還第與  
賓客接才數刻頃顧步趣語默之間輒已得其人之肺  
肝若素知之此何為也耶某謹對曰相國惟公故生明

惟定故能應惟虛其心故能服天下輔政于茲一年而  
中外底平百志緝熙遂濟登茲不動聲色相國以是三  
者也相國以是三者計安天下其於知人也何有某也  
楚之鄙人也聲名無聞於時問學不足以取世資流落  
田野十有八年偶得不死耳今亦踽踽然來蘄望泰符  
之輝以不肖之身受察焉其可其不可不敢自列惟相  
國哀憐財幸之舊詩一編閒居無事紆憂娛悲輒贅以  
見非某之所長也干冒鈞重俯伏俟命

上史參政 浩

某伏讀制詔參政以命世宗儒東宮舊學精神感會臣  
主俱賢顯膺冊拜晉參國秉天下幸甚伏念某疇昔登  
門猥辱知遇生長四明丘墓所寄肝陌相連實同黨里  
不敢獻諛願効微忠伏惟中興以來宮僚幾人若賢若  
不肖主上朝夕之游處毫末曲折弗逃聖鑒而簡在眷  
禮獨公一人事關運數非偶然者累月以來擢用休顯  
中外之士拭目歆艷知參政者則謂淳涵抱負鬱而未

伸逢辰遇合逮今已晚其不知者直云師傳舊恩適用  
故事夫拔之衆人之中寘諸百僚之上自高宗文王猶  
托諸夢卜況如近時風俗益壞橫得一金或媚疾之竊  
料進而賀參政除拜於前退而議參政闕失於後者不  
無其人故今日參政應之甚難亦可懼也圖易其難圖  
釋其懼參政之策將安出願參政深思之今日朝廷之  
上進用人才措畫邊事與凡號令因革某事非某事是  
人不以屬它宰相執政必曰此史參政之為耳盖用之

驟則責之重其理固然況參政方在北門遠方之人以  
邸報不傳興事造業一出參政意今入政府則此名益  
不可避以不可避之名任甚重之責當至顯之位然則  
參政將何以善始善終以無負聖天子以無負天下也  
哉自古在昔莫難於君臣之際二帝三代置而勿論必  
上下一體言行計從雖父子兄弟之密不得與乎其間  
如高祖之於子房先主之於孔明我太祖皇帝之於趙  
中令而後可以撥亂反正創業垂統竊觀陛下繼太上

皇帝而為之子談笑授受雖二百年不成之緒然稽之  
天數與人事實纂承啓運御極之初惟新景命光昭祖  
烈將以傳無窮而施罔極必一遵建隆之舊則陛下之  
得參政何以異於藝祖之得韓王參政於此彌綸動化  
開闔張弛惟危惟微可戒可畏不一而足某雖愚不肖  
誠願有以言之而參政擇之參政儻許之言則請條列  
以告伏惟參政方闢大公至正之路芻蕘之賤試將采  
擇其善某也狂率犯分參政弗怒以教

代李父上陳樞密 誠之

某聞列宿之在天星官厯翁有傳數世而不能盡究其名數者至夫五行之精雖隱伏不見按圖而考之則固已知其躔次之所在與夫善祥之應皆可以前知曰如是則為人主之壽如是則為豐年如是則天下和平若影響之隨無有差忒婦人孺子夜立庭中叩首而望曰此填也此歲也此太白也未嘗學星則既能盡識之矣今夫賢者之於世其間出希有固亦寥寥然如五緯之



相望苟一有焉雖窮在畎畝未見於用已隱然係天下之望曰使是人而出應吾君之求也必能發所蓄以利澤一世而有無窮之聞矣一旦進而坐於廟朝天下又將翕然而稱之曰是吾昔之所期某公也昔吾之所望於是者庶幾乎故雖窮山幽谷婦人孺子亦莫不然何也如五星之在天其晦也人皆得而知之其顯也人皆得而見之故也恭惟樞密以碩大高明之資輔以宏深經遠之學發策決科震耀宇內皆其緒餘不足道者而

天下之所以期望於公而公之所以抱負自任天下之重蓋不在是也前年天子總攬權綱號召數公新美庶政此數公者聲稱德望炳然較著真與芒寒色正者比公在焉是司天子腹心之寄運旋樞極以隆國勢曾不朞月而優游之望得太平之責塞天下之人亦既斂然自足滿慰疇昔而無異辭矣某也楚之鄙人也青衫白髮塵埃一命之選蓋將三十年雖冗散無以自振而所至不能阿意下氣往往不偶卒窮困至是顧嘗為大樞

湯公之役湯公憐之賜以斗升之祿使活軀命今又閱一歲於此矣湯公謂某曰汝往拜樞密陳公之門吾為汝言之某奉命是以來雖然某之見公非直以此故也五緯之行婦人孺子皆得見而識之某誠不肖矣其智固不如婦人孺子矣乎伏惟誘而進之使得自効請以受知湯公者亦受知於門下不宣

與李太尉

顯忠

某聞之當今號稱人傑磊落奇偉可撼以義獨太尉三

數公耳今春過池陽始識太尉置酒高會開心見誠其  
竊不自揆嘗為太尉陳其所以報國一二事太尉不以  
為罪擊節稱善某於是益知太尉之賢常常為士大夫  
道之謂太尉嘗以單騎九百却二十萬之衆它日邊候  
有警奮不顧身星流彗掃敵王所愾者必太尉也自北  
人渝盟聖天子赫然震怒悼已事之失策誕布明詔恭  
行振旅太尉膺上簡拔當國一面悉甲濟江今踰月矣  
敵騎浸淫至于歷陽太尉之軍雖嘗小捷然敵既越險

而南幕府猶在舒城不聞太尉出騎要擊何也豈既追  
北而此未知耶抑太尉方略素定儒生不得而測識耶  
兩日來羽檄自御前至太尉處者相接於道而遷徙之  
民自北而來所傳益急事勢危迫可謂間不容髮矣不  
知太尉將何策以處此今淮西之三帥列屯朝廷安危  
實繫於是太尉與王侯戚侯必須同心協力而後可以  
成功若一人少有顧望吾事去矣伏望太尉思主上平  
日所以期待太尉之厚委曲寘念交歡二帥使無纖芥

專圖國事盡去私心若王侯當其前則太尉宜與戚帥以銳師出其腹背首尾齊應各務致死則彼衆雖多可以立潰萬一不然少有沮抑太尉將何以報天子何以見天下之賢士大夫耶望太尉精思之速圖之無貽後時之悔忠憤激切之懷不能此盡謹遣使臣莫師雄躬造帳前面稟拱立西望以俟嘉音不宣

代任信孺與王太尉權

某聞太尉之名舊矣雖未識面然嘗一再通問及來宣

州見張漕父子日日稱說太尉忠義純一智略沈雄治  
軍訓旅多多益辦今時諸將可一二數某是以擊節誦  
歎願交下風蓋因致書欲太尉以一千人之功名保三  
十年之富貴某所以與太尉心相知者甚厚自北人渝  
盟聖上奮發威斷特整我師天聲震疊山搖海撼太尉  
兼心膂爪牙之任杖秉鉞銳卒十萬式遄其驅揚旌  
濟江分據險阻可謂盛矣中外之士正望太尉以捷音  
聞雖定林之役追北百里然斬獲不多人心未快數日

來或謂敵騎已越滁壽太尉復還歷陽果爾則何為耶  
淮西重地朝廷所責望者專在太尉李侯戚侯其實太  
尉麾下爾事勢之急如此必三帥協義同力首尾相應  
盡去疑間合為一家然後為可今日調護茲事獨在太  
尉太尉聰明辨此不難所願太尉念主上平日眷遇之  
隆不憚少屈遣書致禮交歡二帥相與誓約專意國事  
屏除私心尅日共舉以翦窮荒以復境土則太尉勲在  
社稷身名俱榮竹帛鍾鼎不足稱載萬一不出乎此各



自為謀少失機會悔將何之忠憤激切懷不能已輒以  
尺書布之幕下可否之決立遲一報不宣

于湖集卷二十四

欽定四庫全書

于湖集卷二十五

宋 張孝祥 撰

疏文

乾龍節開啓疏

瑤池御駿悵久隔於宸游華渚流虹欣載臨於誕節預  
憑衆妙遙贊洪釐尊號皇帝陛下伏願體道希夷凝神  
昭曠壽祺天錫順迎滋至之休輿衛星陳佇協端歸之

吉

又

聖人有作風聞里社之鳴誕月載臨茲効華封之祝仰  
憑慧力恭贊壽祺尊號皇帝陛下伏願體道希夷凝神  
昭曠否終必復即期八駿之歸常久無疆茂協九齡之  
與

乾龍節滿散䟽

載震夙以開祥式臨穀旦內文明而養正莫望清塵敢

彈率土之誠恭致彌天之祝尊號皇帝陛下伏願緝熙  
純嘏保合至和壽等南箕共協皇圖之永禮成北嶽巫  
嚴仙仗之還

乾龍節功德疏

襄野間途高蹈無為之表華封祝壽茂迎可久之祥恭  
即殊庭再嚴妙果尊號皇帝陛下伏願既多受祉永孚  
于休風駕言還副君子必歸之望夢齡協永膺聖人得  
壽之符

又

駿馭追風悵宸游之久滯鳳編紀日欣穀旦之重臨恭  
祝鴻釐載清貝梵尊號皇帝陛下伏願消搖物表保固  
天倪問襄野之童終冀迷途之復依西方之佛更瞻壽  
量之增

天申節開啓疏

景運有開方迪延洪之祚珍圖疊紀茂當震風之期恭  
依覺地之嚴增祝聖人之壽皇帝陛下伏願體乾剛健

如日照臨天其申命用休遂臻過歷聖人大寶曰位永  
保無疆

天申節滿散䟽

探赤水之珠已凝神於象表受泰元之策聊玩意於人  
間蓋與造物而同遊則非巧歷之能計尊號皇帝陛下  
伏願備兩宮之樂冠百王之徽億載萬年貴為天子之  
父九州四海丕承太上之尊

皇后生朝功德䟽

椒風流化於昭內治之脩璧月儲精載紀誕彌之瑞增  
祝至仁之壽式嚴衆妙之因皇后殿下伏願應地無疆  
與天合德開燕祥於甲觀申錫百男之休承色養於東  
朝參享萬年之歷

大行皇后僧家宣讀疏

淑德承天方迪二南之化諱音傳遠遽纏九土之悲輒  
憑貝葉之文默助椒蘭之慘大行皇后伏願脫人天之  
調御從帝釋之遨遊夜月在天湛本體清涼之性秋蓮



著水發靈根定慧之香

大行皇后道家宣讀疏

儷宸極於長秋始基王化望崦嵫於永夜痛極輿情輒  
紬琅笈之靈章默助璇宮之仙馭大行皇后伏願悟本  
心之清淨識道體之希夷駟玉虬而上征徑造西真之  
集折瓊枝以繼佩却從姑射之遊

大行皇后齋疏

長秋正位化方詠於兔罝修夜興哀悵莫留於駟馭敢

憑緇褐之侶仰助禱禱之恩大行皇后伏願識道體之  
希夷悟真詮之圓覺藥宮絳闕陪姑射之神人天雨寶  
花超華嚴之法界

青詞

淮西漕司設醮

衆生淪於異物長無超度之期上帝覆以薰慈厥有救  
援之道敢殫誠悃仰冒至真眷茲淮壖頃罹兵劫匪罪  
而死不知幾千萬人游魂無歸于茲二十餘歲或葬之

中野而絕子孫之託或鬱為枯腊而失墳墓之依或凡  
領之不全或草木之同腐傷心慘目舊哭新冤坐令凋  
瘵之餘尚遇和平之喜臣叨將外計念此沈幽惟慙  
於層霄庶興哀於九地伏願綠章上達絳節下臨注南  
斗之生俾謝無窮之苦削艷都之籍溥施蕩穢之恩及  
此民編咸躋壽域

元正設醮

太一常居上帝之仁徧覆大千世界衆生之業無窮俯

當嗣歲之興祇卜剛辰之吉款靈宮而歲事瞻霄極以  
祈恩願鑒微衷誕敷隆施

上元設醮

清都紫極隔世幾塵綠簡瑤章通臣一念撰日三元之  
始馳情八景之高伏願增衍祺祥蕩除灾穢貫其既往  
新以方來錫難老於家庭覃餘休於嗣續

又

玉清嘉會氣實首於上元金簡真儀福用敷於下土敢

宣主德率籲國人敬披致一之誠仰導惟新之慶伏願  
輪囷臨夜聖澤如春萬歲千秋仰奉堯年之永五風十  
雨徧為吳會之祥凡我有生長依道蔭

又

絳闕高居躡千真而下察綠章封事緘一念以遙通當  
甲子之上元惟王春之正月三官校籍屢書黑簿之愆  
九氣騰霄滋味黃庭之景載披雲笈恭款飈游伏願憫  
此餘齡賜之無事退安田里常遂於豐登燕及子孫更

祈於繁衍

十二願

一願一人聖壽二願二儀平成三願三光明潤四願四序休寧五願五行協應六願六府充盈七願七元降格八願八表澄清九願九壘皇君垂福祐十願十乘太乙度灾屯十一願十一耀靈光下燭十二願十二時道氣常存

建康求晴設醮

常陰之罰乃吏弗虔暑雨之咨彼民何罪人今露宿田  
與江通環數州秔稻之鄉渺千里波濤之險疾病飢寒  
之既迫逋亡蕩析以奚疑仰惟當宁之仁屢敕振廩之  
詔已舛有秋之望終懷卒歲之憂扣首祈恩拊心無策  
伏願宏開矜宥溥示救援稽天之浸潛收不葬魚龍之  
宅併日而食弗飽尚全雀鼠之生哀此下民斂時五福

荊州修堤設醮

古之南郡今者西門控吳蜀之咽喉兼襄漢之唇齒兵

戈蹂踐閱四十年版籍凋殘無三萬戶屬故歲有防隄之失當隆冬興土木之工徭役既多流亡是惕歷三元之初日按八景之真文恭闕靈場肅延霄馭仰贊兩宮之壽俯祈一道之安錫以豐年保其常產貫餘災於比屋移厥咎於微臣帝之所臨臣不敢悔

遷居謝靈惠王設醮

徧覆包涵實下民之陰隲聰明正直斯百祀以光輝乃眷昭亭山之陽誕惟梓府君之宅受命于帝降神此都



不怒而威有感斯格閔孤生之流落錫嘉夢以丁寧俾  
冀攸居第安汝止仰明靈之昭荅俯危跡以震驚恭按  
真文具嚴報禮所冀雲霄之馭來臨仙闕之祠儻闔門  
益荷於純禧將永世畢依於大道

謝火災設醮

天愛斯民欲其逢吉吏媮厥職所以致菑蓋二千石之  
非賢俾十萬家之屢警拊心自悼稽首知歸冀矜宥於  
叢霄遂輯寧於比屋匪臣私禱惟帝博臨

設九幽醮薦所生母

終身之恨弗逮於慈容小己之私可干於洪造啓盟真  
之玉籙嚴款聖之瑤壇頓首求哀齋心望報伏願垂恩  
九地申敕三官或已注南斗之生則冀福齡之延永或  
猶滯酆都之對則祈罪罟之蠲除交貯響於幽潛通爽  
靈於夢寐更令同氣均此殊休

代總得居士保安第三男設醮

人愛其子惟疾之憂天聽自民必從所欲伏念臣第三

男臣孝直慙於福植幼也多艱涉秋以來病滋為崇閱  
日既久藥且不持悼賦質之奇偏懼風緣之多累非歸  
誠於造化寧有望於安全恭按靈科具申哀禱仰冀雲  
霄之澤不遺草芥之生俾終協於大和誓永依於至道

謝過設醮

三塗苦趣流轉無窮八景真科超躋有道具輪危悵祇  
冒聰聞伏念臣涉世之難惟天是恃謂將晚節稍遂安  
居餘孽未除叔子云逝雖修短不逃於物數然咎休率

繫於人為輒歸命於紫清庶蠲名於黑簿雲霄降格雨露均霑俾微生蒙宥過之恩而已死追沈幽之苦更隆鴻施脩暨羣倫

釋語

請道顏住撫州報恩疏

大雄一隻虎震伏羣魔揚岐三脚驢蹙蹋四海欲振當年之門戶須煩本分之宗師顏公禪師傳妙喜之衣得圓悟之髓日光玉潔雷厲風飛噴香爐之紫烟巨堪滿

戶之屨懷錦宮之春色忽尋上峽之船惟法眼之道場  
實正庵之舊隱雲無心而出岫水有時而回淵莫辭振  
錫之游再結繡經之社休去歇去尚堪一行瞻之仰之  
如是三請

請恩老住蔣山疏

陝府鐵牛脚力負萬鈞之重石霜角虎眼光搖百步之  
威欲轉無上法輪須還本分尊宿恩公長老一生打硬  
四海知名楊歧栗棘蓬當仁不讓國師無縫塔此義却

諸截斷衆流壁立千仞乃眷鍾山之勝地實繫園悟之  
昔游俗駕初回潮音未振考之公論僉欲師來拗折竹  
筴且與逢場作戲橫擔拄杖直須覲面相呈稽首妙華  
王請祝聖人壽

請三祖長老疏

陝府鐵牛脚力負萬鈞之重石霜角虎眼光搖百步之  
威須全提向上之機關始克振作家之號令厥惟勝地  
今得偉人某人斤斧叢林鑪錘古佛金剛王之寶劒截

斷衆流秘魔巖之木叉宏持末法諸公刮目學者傾心  
睽三祖之道場在羣舒之佳處吳陂瀉碧龜魚樂得於  
主人瀟嶽摩霄龍象將依於法席用勤勸請實冀肯臨  
飛錫度江豈獨慰西州之父老傳衣此地庶不辜後代  
之兒孫願聞法鼓之鳴要看草賊之敗

請亮老住報恩疏

佛法見前惟嫌揀擇衲僧分上便合承當亮公長老徧  
歷叢林屢開法席一莖草化成寶刹風具神通三條篋

緊束肚皮最諳枯淡惟報恩之勝處崇永祐之真游不  
有當仁孰嚴上善三十年事鹽醕要還舊日家風二千  
里賣布單且看新人作略

請舜老住浮山疏

三千大千總是無邊佛刹一箇半箇難得本分道人但  
看直下承當且教逢場作戲舜公長老入華嚴海得解  
脫門牢絆草鞋飽參知識撒開布袋厯勘諸方留須水  
以彌時會浮山之虛席殷勤屢請珍重此行菩薩子喫



飯來且與鐘魚作主好阿師恁麼去要令龍象依仁二  
千里外不得嫌人三十年後切忌錯舉

請鑑老住潭州東明崇教寺疏

浮休居士昔守此邦東明觀音初出廢井神光煥發寶  
刹崇成檀施滿門曾安五百衆荆榛塞路將欲四十年  
會茲淫雨之苗歛我有秋之望肅齋致禱響答不違香  
火未收陰雲解駁吏民絕嘆豈有前聞僚寀僉謀當嚴  
報禮主僧老曠破屋欹傾冥搜當仁喜得此老伏惟鑑

公禪師支撐末法領袖諸方盤結草庵曾到孤峯頂上  
撒開布袋何妨十字路頭況惟今是老人乃是吾家請  
主為公著力何患不成惟佛有緣所當外護撞鐘打鼓  
今朝震動於三湘刻石鑄金異日流傳於四海

請無著住資壽就報恩開堂疏

明月堂中昔分半坐采蓮涇上今建刹竿不憂此道之  
無傳賴有斯人之足慰人天合雜山水清明資壽無著  
禪師具大總持證不思議洗滌諸方五味吞揚岐之栗

棘蓬降伏一切羣魔用妙喜之竹簞子獨會先師之意  
卓為後學之宗四海無人千聖推出伏願慈悲攝受方  
便舉揚以心傳心山頭老漢元不死惟佛與佛汝等諸  
人皆可為敬焚一瓣之香增祝兩宮之壽

于湖集卷二十五

欽定四庫全書

于湖集卷二十六

宋 張孝祥 撰

釋語

請龍牙長老疏

虎谿寺裏曾聞嘯月吟風龍牙山中更看拏雲攫霧當  
仁不讓易地皆然混融禪師具足神通綱維象法一絲  
不掛無人無我無衆生萬境皆融能縱能奪能殺活歷

徧東州之名刹未登南嶽之曾顛偶尋上水之船肯振  
飛空之錫三千世界不妨到處嬉游七十二峯政要從  
頭點檢

請北禪長老疏

妙喜既亡卍庵復往國師無縫之塔弟子誰諳楊岐金  
剛之圈諸方不會必有嫡傳之嗣來興已隆之宗珠公  
長老法治祥金禪林偉幹摘神龍之頷獨收無價之珍  
生老蚌之胎真是寧馨之子頃由臨汝徑隱匡廬遇坎

乘流聊當適意逢場作戲況是知音我為東道主人君  
作北禪長老彈千相之雀莫輕上妙摩尼照十乘之車  
遂遍無邊刹海

請新首座住福嚴疏

十字街頭彌勒撒開布袋孤峯頂上德山盤結草庵況  
茲古佛道場祇是吾家舊物不要客僧作主須煩首坐  
燒香新公長老性悟真詮腳踏實地泊船淺水久矣淹  
留韞玉空山自然光彩疇昔因緣已定如今時節到來

便將舊店新開切忌衆生作例好阿師恁麼去何妨覲  
面相呈菩薩子喫飯來却是無法可說宜從衆請用報  
國恩

殊公住嶽麓惠光寺疏

湘西佳景嶽麓精藍方丈久虛其人使君今有此客殊  
公長老面如滿月額有圓珠枯木堂中隨粥飯緣坐處  
不落第二臺山路口有多少衆問時便契前三君如洗  
脚上船我是因風吹火不起于坐只今直入道場偶爾



成文領取見成公案

請珠老住公安二聖疏

一切衆生各具自然之眼十方諸佛初無人爾之心至  
於舉拂拈槌嘲風笑雨豈云妙法無法大是指空說空  
然業識與生而俱迷或冥行至死而不悟不有開士曷  
暢真乘珠公禪師傳臨濟真宗授卮庵密印庭前栢子  
何曾仗境分踈石上蓮花到處為人說似眷菩薩應真  
之化境乃安公著迹之精藍大開選佛之名場思得住

山之本色孤峯頂上要觀出世因緣十字街頭莫惜隨時演唱見幾而作快便難逢願垂惻隱之慈俯徇殷勤之請

烏江廟門疏

繡裳畫袞方瞻王制之嚴寶宇璇題洊被天恩之渥仰威靈之肅振惟輪奐之未新宜崇朱戶之居益壯烏江之望憑高配極會看妙絕之宮牆吉日良時即下鏘鳴之玉珥

蕪湖修浮橋疏

萬家之邑百賈所趨一溪之橋累歲不葺繫破船之六七當駭浪之千尋溺馬殺人習為常事饒蛟羈鬼實使甘心所願因民病涉之憂遂為此邦無窮之利入谷斬木造舟為梁不日成之吾事濟矣但度無苦會看百步之修欄得福甚多共脫三塗之苦海

代總得居士東明施財疏語

夜夜放光傍人不見時時得夢獨我自知共惟浮休先

生今者總得居士過去見在事同一家原始要終業通  
三世欲纂昔賢之隆緒重嚴大士之寶坊答一時救護  
之恩崇此邦祈禳之福若男若女咸歸生育之仁曰雨  
曰暘屢報豐登之瑞

病愈答願供佛道場疏

六道三塗無非厲虐十方諸佛普示救援載軫幻軀夙  
依真諦屬有負薪之疾願薦伊蒲之羞精神所加昭應  
如答未修報禮每惕初心驚半夜之鐘常交於夢寐求

三年之艾又爽於節宣用敬復於前言以導迎於新社  
伏願徧周沙界悉坐道場聞秘密言而除貪嗔癡受甘  
露味而得戒定慧使衆生業障因法施而蠲除則弟子  
沈痾當不藥而清愈稽首阿難教為我大醫王

南山昭慶觀音障坐偈

南山昭慶白衣觀音作始何人如此相好地僻寺古僧  
無卓錫空堂巋然徒四壁立香火已絕而況莊嚴稽首  
大士本來無住一絲不掛清淨法身況此塵垢而可汙

染但此末法冥頑不靈不知即心是觀世音來瞻慈相  
乃起恭敬則此慈相不可不葺合掌贊歎諸善男子各  
捐薄少隨喜護持俾道人素作高廣坐及其屏障飾以  
金碧前列供具熏爐華燈祇十萬錢具足圓滿諸善男  
子一彈指頃而此殊勝億劫常住

吉祥寺經藏疏

五千四十八卷尊經藏之金匱百萬億那由他諸佛同  
此道場常轉法輪乃安斯室齋廚不繼可憐野寺之殘

僧斤築隆施須煩寶積之長者肯捨太倉之一粒便成  
廣廈之千間莊嚴不思議功德山安住無邊際華嚴海

為第二妹設水陸疏右語

諸佛等慈廣有救援之路衆生諸惱莫如疾病之侵俯  
惟同氣之微偶愆勿藥之喜方輸危悃即底泰和曉然  
夢寐之間示之肝蠻之報用亟修於淨供庶祇答於能  
仁萬劫狴牢冀脫幽沈之苦大千川陸悉斬悲樂之均  
更哀佛力之無邊益侈家庭之後福

宗琰作永寧寺鐘成欲作鐘樓記講師求予開  
疏信筆書此數語以勸施

稽首我導師方便度一切衆生執若故不見本來性以  
是勸布施捐頭目髓腦身命尚可捨而沉於財物今此  
大寶鐘辛苦所成就無量佛聲海四海所願聞以無鐘  
簾故猶與無鐘等我觀此都邑衆寶之所聚而彼富長  
者皆受佛記剝佛欲警拔故令作此鐘欲勸布施故  
復作大寶簾不思議功德在汝一念頃我為汝說偈發



汝喜捨心圓滿清淨業證無上菩提此鐘橫撞時汝等  
皆作佛

方廣元公刺血寫經偈

稽首如是經萬行首楞嚴覺元古尊者刺血之所寫尊  
者住世時寫經百千卷以字以畫計數與河沙等自其  
一畫初以至絕筆時念念相接續無一不同處翻覆風  
水輪劫火大千壞此心未嘗動此筆亦不停尊者今寂  
滅誰識寫經意我為汝演說尊者所記剡衆生與諸佛

同出一父母我血佛身血初無差別相佛從此血中放  
百寶光明如月貯瑠璃根塵悉清淨而我矢溺囊溷雜  
諸濁惡業欲自纏繞頃刻即腐敗尊者為是故哀憫於  
一切故以我之血書佛所說經令汝愚癡人頓見本來  
性佛經與我血還復成一體經盡血亦盡佛與我俱無  
尊者下生時汝等成正覺

總得居士命作為平國弟度僧䟽

駒犢之愛已荷於等慈龍象之依嘗深於夙願顧年齡

之尚幼恐歲月之或淹惟慧海師實平時之知舊而優  
婆塞自有生而薰脩度已度人是同是別伏願諸佛護  
念大衆證明俾此善男子速證於菩提則我長頭兒同  
增於福壽

追薦六二小娘子水陸疏

代總得

人誰無死獨抱難言之寃佛是真歸冀垂善救之力亡  
女六二娘怨親融釋體性圓明知住壞之俱空忘生平  
之不滿徑超十地永脫三塗及兩孤兒獲無量福

重修三塔偈

七澤所瀦十年九潦三塔雖在四壁常空仰衆佛之尤  
奇念殘僧之益少化身千百億莫非為物慈悲彈指一  
刹那孰肯隨緣布施爾時居士復說偈言

寶塔元不壞因汝有壞時但使塔重成汝得不壞果  
妙定化僧偈

行者要作僧妙定欲說偈因緣啐啄時見者須撒地圓  
頂更方袍諸法從此起誰具大神通成就一彈指

出隊疏

此大蘭若蓋古道場野寺殘僧齋廚不繼震風凌雨棟  
楹隨欹惟世尊住華嚴界海到處見成顧佛法付有力  
檀那不應坐視宜分薄少來相經營

靈巖行者化僧偈

咸安郡王功德主智積菩薩大道場有善男子名德柔  
欲為大僧無度牒我今說偈為勸請願見聞者皆樂施  
此善男子得度已俱證無上菩提果

蔣山明老贊

衡陽梅嶺被本師打得背喝鍾阜長蘆上法座叫得地  
動晚年雙徑却遇知音因喫乳糖過多併將漆桶打破  
賀賀識渠麼十字街頭每相逢百尺竿頭還蹉過

天禧行者廣如化僧偈

法華十萬餘言度牒三百來貫更著居士疏頭共是三  
重公案若要作一串穿自問山頭老漢

卅庵贊

氣骨清羸抱負雄偉  
江西湖南掀天撲地  
生子當如孫仲謀  
景升諸郎豚犬耳

行者求僧偈

結萬人緣度一箇僧  
求我說偈恰似不曾

元布袋真贊三首

劫火洞然大千俱壞  
留得拳頭千妖百怪  
三十年後此話行  
依舊當時元布袋

細入微塵大周沙界  
與古為徒無乎不在  
催教彌勒下

天宮卻送胡孫入布袋

劫數茫茫眇此身夢中相見覺非真  
常時只笑憨皮袋  
十字街頭等箇人

乾明舜老度弟子求疏

學道參禪不必僧祖師元是嶺南能  
若無向上真消息  
鬚髮除來只可憎

出家須要護身符錢在檀門不可呼  
乞與青銅三十萬  
大葫蘆結小葫蘆



應庵老偈二首

應庵老子六十我已新添一年欲話元正啓祚山僧約  
我茶邊

涉世須三洗骨憂時定九回腸借我昭亭一榻伴師掃  
地添香



于湖集卷二十六

欽定四庫全書

集部

于湖集卷

二十七至  
三十四

詳校官起居注主事臣顧宗泰

主事臣呂雲棟覆勘

總校官知縣臣楊懋珩

校對官主事臣陳 庸

謄錄監生臣陶紹侃

欽定四庫全書

于湖集卷二十七

宋 張孝祥 撰

祝文

東明觀音祈晴文

一年之望在茲杪秋常陰之災至於閱月未已熟而弗  
獲歲垂成而反虧誰哀斯民有我大士伏願迷雲開廓  
慧日照臨畢此場圃之功行其倉箱之積一刹那頃肯

運慈悲無邊衆生皆得飽滿

謝晴文

八荒同雲一雨十日雖大田之多稼蓋平陸以成江仰  
慈願之宏深成歲事於俄頃香烟未斷霽景先開惟此  
寶坊夙嚴之功用為無邊豐登之報

祈雨文

三湘之區比歲不熟乃今七月復以恒暘風霾未休陂  
澤弗戒吏則失職民其何辜頓首求哀齋心望報賜之

一雨惠我豐年百穀用成四海蒙潤

謝雨文

旱魃為虐實深民憂靈雨既零頗寬吏責仰荷生成之  
賜敢忘昭謝之誠尚冀宏仁益終大惠

祈雪文

嗣歲將興嘉雪未應既闕豐穰之兆且虞疾癘之多歸  
依宰堵波之仙覲覲平地尺之瑞陰雲合雜風霰飄零  
雖違三白之占亦慰九豐之願薦伊蒲之供敢忘報禮

之修望來年之貽尚冀慈休之廣

謝雪文

並江而西歲窮不雪土脈焦槁民憂疾癘吉蠲致禱神  
則昭荅三日之雨繼以飛霰宿麥數潤寒氣乃周惟神  
之休敢忘拜賜

南嶽謝晴文

環湖南之境田之以畝計者不知其幾千百萬而民之  
嗷嗷望歲者又不知其幾千百萬也若夫疇昔之雨再

宿不止田盡入於水已熟之禾盡壞為吏者誠皆以罪  
誅斥不足道而民安取食嗚呼噫嘻嗟乎殆哉夫既走  
禱於帝神內揆蒙暗帝神不顧享然而卒賜之則帝神  
哀此民而臣某無以獲此也祇率僚吏申款祠下不敢  
私謝敬為民謝

謝諸廟祈雨文

郡縣吏不謹於事神誕降之災以警懼之迺自夏六月  
至於秋七月不雨禾立而槁陂池將竭環視無策是用



致禱于神惟神赦吏之愆哀此下民惠我有年沛以甘澤吏得苟安其職神亦永有榮盛

寺觀謝雨文

七月不雨方深卒歲之憂三日為霖遂愜有秋之望具嚴報禮申輯齋盟仰冀博臨益垂善應螟螣不作迄臻場圃之成蠶獠既安長無疆場之擾

又

全楚之區頻年告旱望此一稔慰茲羣氓方投懇禱之

誠果報需濡之賜興農工於錢鎛寬吏責於簡書謂天  
蓋高無德不報願廣不言之利以畢有年之祥

迎嘉顯孚濟侯求雨文

望神之來以日為歲颶輿在望亦既勞止一觴門迎祇  
薦微衷隨車之澤立冀昭荅

祭嘉顯孚濟侯文

惟神廟食茲土赫然威靈司雨暘禍福之柄以受寵天  
子列于通侯今久不雨陂池枯竭民以病告神亦遠顧

臨之矣忍視此嗷嗷而不賜之以膏澤耶牲肥酒香敬薦厥誠三日之霖拱立以俟

又

神不以守之愚肯顧臨之惟室宇庫下不足以揭虔妥靈願神亟賜甘澤當作新室于州之郭使民朝夕承事雨暘豐凶厥有常數所以致禱于神亦曰神將閔吏之愚軫民之不獲誕告之帝招呼風雲闔闔陰陽捐咳唾之施惠我千里燕及四鄰如是而已

又

奉神妥靈亦既有日昨莫之雨僅足以濯熱而清塵負  
郭之田龜坼如故豈神終不顧哀此邦之人也耶抑吏  
薦羞乞靈未臻其至也有牲登俎有酒清醑有擊斯鼓  
有巫紛舞神來不來使我心苦

公安二聖祠祈雨文

春氣已敷時澤弗降人牛俱病川瀆揚塵惟我二如來  
此此一都會飲食必祝疾痛則呼願起光明之香雲遂

澍甘露之法雨潔齋以請昭應為期

請顯應彌勒瑞像祈雨文

自冬徂春累月不雨癘疫交作鬱攸屢驚井泉一空天  
霧四塞早既太甚變不虛生哀此下民繫我大士伏願  
慈雲普覆法雨均霑運諸佛之神通慰一州之繫望

奉安新廟文

惟侯威靈達于四境物阜人安無有疵癘歲月滋久壇  
壝弗修無以揭虔無以妥靈我是用懼即于新宮新宮

既成既成翼翼侯居其中遺我遐福匪清斯酒匪潔斯  
牲以慶其成來止來寧

祈晴文

惟天子以農桑之政寄之吏惟上帝以雨暘之柄司之  
神吏相其業神節以時各稱厥職今麻麥未登而淫雨  
踰旬吏用齋戒以望于神假以三日之晴則農事斯畢  
吏塞其責而荷神之德厚矣惟神實圖之

謝晴文

皇靈昭宣百神受職曰雨而雨曰暘而暘雨暘以時農  
事俱利此邦之民實無常心雨好晴佳惟其所欲比以  
霖潦謁于靈祠香火未收陰雨四歛桑麻滿野黍稷登  
場荷神之休無所昭報五風十雨格以豐年惟神之靈  
終此大惠

皇太子疾亟謁廟文

某奉丙申赦書皇太子偶興節宣之和既肆大號盡宥  
囚繫又勅守土之臣敬走羣望以靳勿藥惟皇太子毓

德青宮仁孝聰明聞于天下社稷宗廟之靈所宜右助  
何恙不已惟神受職當體兩宮繫念之重儲祥薦休使  
皇太子即日康復以釋兩宮之憂以慰四海之望

到任謁廟文

某往來湘中三年矣風聲氣俗亦略究知撫摩安集之  
政不敢不勉以企前躅惟神尚右相之使克有所施設  
先聖廟文

某起自諸生冒天子民社之寄晝夜祇慄懼弗克任惟



吾先聖所以教某者具在方冊不敢不勉服事之始敬  
拜廟下尚惟聖師相其微衷

后土東嶽文

下臣蟣蝨天子使守民社服事之始敬有謁匪祈厥  
私冀以及民

諸廟文

某以蒞官之始祇謁祠下不敢私禱惟區區之心願有  
以及民尚陰相之俾克有濟

致語

湖南宴交代劉舍人

珠幢玉節來宣上將之威赤舄袞衣歸授元臣之柄乃  
眷門闌之舊獲承尊俎之餘陳九獻之縟儀表十連之  
盛事某官聲名四海翰墨兩朝騎麒麟而翳鳳凰蓬叢  
霄之嘉會射駿驤而掩翡翠扈紫禁之清塵主眷式隆  
士心景附八命伯九命牧具瞻賜履之雄萬石簾千石  
鐘載旌帥閫之伐靜掃綠林之寇嚴趨清蹕之朝望碧

紗之籠久注神仙之籍聽白麻之告徑躋丞弼之司況  
嗣建於旌旄實親傳於衣鉢且慰列城之望少為數日  
之淹醉我舊官壽公慈母聲流夜瑟莫非鼓舞之兒童  
淚點秋竿却是攀留之父老某等幸瞻高宴猥列賤工  
敢酌民情上陳口號

年時授鉞許專征蜂蟻千屯一笑清已變耕桑彌曠野  
却驅旌旆入神京才從湘水東邊去且到台星極處明  
傳語邦人莫留戀使君元是我門生

句曲

十眉就列箏敷要眇之容三穴既空綽有回旋之地宜  
呈楚舞再鼓湘絃上悅台顏後部獻曲

荆南宴交代方閣學

高牙大纛來威江漢之濱閒館珍臺去躡星辰之上壘  
兩世無窮之契侈一時創見之榮符節親傳尊壘風設  
伏惟某官學該今古名滿寰區元老克壯其猷既宣竭  
四方之力廷臣無出其右盍登延三事之司上永懷夜

半之詢公雅動秋風之興綠章封事重違勇退之言黃  
紙除書即是催歸之詔細數授衣之月預占拜袞之辰  
某官敢謂交承實均子姓九門置鑰已慚糠粃之前五  
嶺建旄未覺規模之遠亶如今日復接後塵萬旅連營  
肅中嚴之鼓吹十眉環坐紛合奏之笙歌期慰父老之  
情敢奉俳諧之語

蓋世英名五十年功名久合冠台躔只從紫塞傳歸詔  
便上黃扉領化甄事契兩家應更好節旄三鎮適相傳

荆江便作松江看  
小駐秋風下水船

于湖集卷二十七

欽定四庫全書

于湖集卷二十八

宋 張孝祥 撰

定書

下定書

門館游從早託金蘭之契衣冠歆豔共稱冰玉之賢儻  
非姻好之求孰識交情之厚伏承令女閨房挺秀某男  
中饋偶虛雖文采風流難繼乘龍之喜而幣帛筐篚聊



陳執鴈之儀但顧衰宗有慚佳偶

送禮書

門闌甚盛素高冰玉之稱聲氣所同願託葭莩之好惟  
季女蘋蘩之未采屬大兒水菽之乏供儻能撫有其室  
家抑亦親承於師友共陳不腆用締無窮

六二弟定沈氏書

同氣相求早傾風義嘉耦曰妃願締歡盟伏承令女賦  
德靜專久聞姆訓而某姪孝覽秉心寒苦頗讀父書惟

臭味之不殊故攀援之敢冀徼福先祖假寵袁宗爰契  
我龜既協三星之吉言秣其馬願觀百兩之將

回韓子雲定書

望宗國之喬木必有世臣詠澗濱之采蘋庶承先祖某  
之長女僅若而人有如君家猶子之賢飽聞諸公平昔  
之譽願交久矣託契欣然腆儀來家永好無斁莫如韓  
樂敢同蹶父之相攸固有平貧終慙張負之予女

回沈子直禮書

甚似其舅早聞宅相之賢僅若而人儻遂家肥之喜誤  
拜委禽之寵終慚鳴鳳之占非公焉有此甥宜妻以兄  
之子鹽絮詠風前之雪敢擬昔人箕帚掃堂上之塵庶  
無失職

回韓崧卿定書

閱閱之華大非其耦婚姻之託初不敢聞遂成永好之  
堅實繫嘉命之辱伏承令子提宮直閣被服寒素不怙  
富貴而驕某姪女四八娘生長賤貧頗知正順之守鴈

幣來寵龜占亦從僅若而人得事君子習姆師之訓敢  
云張仲孝友之風承舅姑之賢庶圖韓姑燕譽之喜

題跋

跋山谷帖

字學至唐最勝雖經生亦可觀其傳者以人不以書也  
褚薛歐虞皆唐之名臣魯公之忠義誠懸之筆諫雖不  
能書若人何如哉豫章先生孝友文章師表一世欬唾  
之餘聞者興起況其書又入神品宜其傳寶百世恭聞

徽宗皇帝評公之書謂如抱道足學之士坐高車駟馬之上橫斜高下無不如意聖人之言經也晚學小生尚安所云

跋道徳經碑

荊州開元觀直牙城西五百步有南極注生鐵像祥符八年更為天慶觀紹興五年遷觀楚鎮門之東舊觀廢乾道五年春某與客過焉像在壞垣中覆以竹屋屋後積草草中小碑高三尺即初建天慶觀記去草見碑跌

隱隱有字洗刷久之可讀蓋唐明皇所注道德經是時  
詔天下道觀皆立經幢因火中折天慶之後官吏督促  
妄道士不暇它求石即取折幢穴其腹植碑焉經文行  
草注楷法行間茂密唐經生固多善書然此或非經生  
所能辦也既還碑天慶發地出趺合八方得三千餘字  
剝缺斷續益奇古百夫輦致文公堂下歷陽張某識

題王朝英梅溪竹院

朝英童子時與余同師已而同登名天府不見十年壬

午春余自建康還宣城道過朝英所居為留一夕朝英  
誦近詩數篇句法清麗方築屋竹間聚書謝客益豐所  
學蓋朝英之進而及於古未可量也張子曰夫士惟學  
而後知不足今朝英不以其能自畫車堅馭良策之以  
無倦異時余將復訪朝英於竹院則其所稱歎又不止  
於詩而已也朝英尚勉之閏月既望張某安國題

讀謝夢得文

夢得天下之奇士彼齷齪者固不足以知之其文浩瀚

如卷東海而注之江河奇偉激越紛萬車甲馬而爭馳  
視其外則枯木寒灰槁項黃馘若真無意于茲世者之  
所為

題龔深之侍郎太常奏橐後

元祐諸老愛君之心切至正人倫於夫婦之始當時曲  
臺議禮則此四君子在焉嗚乎盛哉幸已春正月上吉  
跋周德友所藏後湖帖

德友少時趣尚奇偉一斗百篇諸老先生慕與之游今



歲晚矣訖未有識一飽之不謀可歎也右後湖書帖自  
甲軸至己紹興二十八年三月望

題蘇庭藻所作張漢陽傳

漢陽一節視古無愧而庭藻猶以成敗為言何也鍊石  
補天斷鼇立極雖不吾以吾其與聞之

題真山觀

張安國設道供于真山觀飯已同郭道深滕子昭吳仲  
權陳叔蹇聯騎訪無無道人登永寧寺閣遂入西山煮

茗於超然亭北風欲雪諸峯獻狀景物之勝不知身之在嶺表也乾道元年十一月七日

題楊夢錫客亭類藁後

為文有活法拘泥者窒之則能今而不能古夢錫之文從昔不膠於俗縱橫運轉如盤中丸未始以一律拘要其終亦不出於盤蓋其束髮事遠遊周覽天下山川之勝以作其氣所與交者又皆當世知名士文章安得不美耶余官荆南夢錫自交廣以客亭類藁來精深雄健

視昔時又過數驛讀之終篇使人首益俯焉歷陽張某  
安國書

題陸務觀多景樓長短句

甘露多景樓天下勝處廢以為優婆塞之居不知幾年  
桐廬方公尹京口政成暇日領客來游慨然太息寺僧  
識公意閱月樓成陸務觀賦水調歌之張安國書而刻  
之崖石

題蘇翰林詩後

右翰林侍讀學士贈太師魏國蘇公之詩乾道丁亥三月望張某過金山長老寶印作堂上方請名於某敬取公詩中語名之曰玉鑑而書其詩使刻山石

題單傳閣記後

去年九月某守建康公行部至郡嘗見屬書此記時文未具也今年夏某將赴桂林道過隱靜則記成而公蓋死矣感慨以泣敬如公志

題陳擇之克齋銘

陳琦擇之名其齋曰克張敬夫為之銘某復為書聖師  
問答與敬夫之銘置齋中左右序乾道丁亥七月張某  
識

題所贈王臣弟字軸後

王臣弟不見二年頽然而長學業甚進以此軸求作字  
不能佳也

于湖集卷二十八

欽定四庫全書

于湖集卷二十九

宋 張孝祥 撰

墓誌

湯伯達墓誌

伯達湯氏諱砮處州青田人也大丞相榮國公之長子  
贈太師衛國公之孫太師申國公之曾孫歷官右承務  
郎承奉郎監潭州南嶽廟主管台州崇道觀授浙東安

撫司主管機宜文字未上而卒娶潘氏一女六歲嘗生  
二男子堅老頑老皆未晬而夭伯達葬于隆興之改元  
在麗水縣東度溪過峽嶺距衛公之墓隔一山三百步  
許其名曰東塘蓋伯達生於紹興之己未而終於紹興  
之辛巳年二十有三而止耳嗚乎悲夫痛哉丞相以書  
謂某曰余子幼而愿不好弄長而益恭每拱手危坐終  
日讀書外未嘗他語余與朋友論古今及人物處其旁  
應唯唯客去徐理前語道是非陳可不皆出人意表紹

興丙子朝家申嚴試闈之禁宰執子弟莫敢應書余待  
罪政府科詔兩下皆不赴閒居作詩苦思至忘寢食詩  
成識者以為深病方亟適余生朝猶自力為百韻律詩  
以為壽其勤如此嘗鼓琴後亦置之餘無所嗜好也紹  
興庚辰余免相奉祠余子留其孥於婺而從余歸鄉來  
年正月聞其初生子病冒大雪涉峻嶺往迎之二月歸  
感嗽疾余以是寒氣之所薄行愈矣涉夏至秋復作增  
以脾泄十月余被召赴闕時金兵既大入抵和州人心



惶駭余受命當疾赴顧念其病未能決迺諭余曰國家事急大人當行某病未殆也詔以二十六日至余以二十七日行送上車無一語投淚而別余心慙然若有所失而不忍言也至行都每五日或七日必得書云疾稍間矣至十二月不得書者旬日余驚焉時敵人死兵車駕視師余為留守十日得書語支而字楷凡兩紙數百言余默念彼久疾迺精明如是是誠愈耶書來之明日家中報以病且亟又明日得報又翌日而訃來余苦毒

恫傷不知身之有無也嗚乎彼書之詳且謹是誠與吾  
訣也余雖遭此禍而縻筦鑰不能去既而移守紹興今  
年之三月始得歸視其殯追思前歲之別生死縣隔一  
何冤也余至家凡三月四視其殯六月十三日余復被  
召迺酹哭而別焉既而行於旁近萬山回掩中為平田  
曰是可為墓以葬余子託所親葉君蘧訪焉且卜之以  
書來曰是地良吉既築垣而甃壙矣仲冬丙申於葬為  
吉不可易也嗚乎人之愛莫父子若也余子愿而文又

甚愛之其病也不能躬理其藥餌以至于死死而不親  
斂焉今余蒙恩復相累丐歸不能遂其葬也又將不復  
送焉揆之人情吾之哀可勝道哉末如之何矣姑集其  
平生以告於能文之君子為余志其墓以寄余哀其可  
矣然吾子少而死無可紀者也無可紀而猶為之志所  
謂余情之哀不能已而託於是焉者也古之表墓也以  
官爵著哀榮之義也余子假蔭而官未試而死官爵不  
足言也古者幼名冠字余子之亡其得字也蓋三年耳

嗚乎可哀也哉安國於余特厚今敬煩安國為銘余子之墓且篆其額曰湯伯達墓題其首曰湯伯達墓誌銘以志余無窮之思焉蓋丞相之書如此嗚乎悲夫痛哉昔者某登丞相之門雖不識伯達而知其為賢也夫賢而早死天下之所哀也而況丞相父子之間也哉丞相幸教某命某以銘不敢辭銘曰

止乎若拱而窺行乎若僂而隨儼容服之在側忽不見兮馬之甚嫩兮好修珮寶璐兮冠琳瑯問塗兮萬里蹇

將駕兮摧輶東塘之水兮沄沄山回阻兮此藏夫君後  
千禩兮勿毀欲知其哀兮視茲刻文

汪文舉墓誌銘

余年十八時居建康從鄉先生蔡君清宇為學清宇之  
門人以百數有汪氏子膠者小於余兩歲修謹敏銳獨  
異流輩余亦敬而友之也方是時膠之家在豫章獨其  
大父字文舉公者攜膠以俱欲膠之有成也不復治他  
事晝夜督課與膠上下卧起居無何膠蘄然有聲場屋

連取鄉薦號名進士後十年家君奉使淮南膠之父處  
仁官舒之桐城亦以才辦治家君薦之蓋膠之學以有  
立與處仁之能其官文舉實使之然也文舉今死矣膠  
以銘見屬余與膠游二十年余官臨川吳門膠嘗千里  
來過其守建康也膠受館於余為直記室余居于湖膠  
率兩三月輒一來來即留一月或四五十日蓋與膠投  
分如此而文舉能教其子孫又可銘也銘其何疑文舉  
之先建康人徙豫章之武寧遂為武寧人事親以孝稱

親亡哀毀過禮雖老矣言及其親未嘗不泣也以是子孫皆孝謹家饒財自奉甚約至周人之急劇於已事紹興初江西旱米斗數千文舉視其困倉尚可得緡錢十數萬盡斥之以與鄰里有王生坐大獄請盡鬻其產於文舉文舉感然曰若是則而家何以生耶視其直併券歸之王生賴以免文舉之父字平甫幼孤嘗隨其母適李氏文舉視李氏與汪姓等經紀其家教其子它日李之子有醉而溺死者文舉哭之慟厚葬之膠方試春官未

之知也夢衣冠而謝者曰吾兒不謹死於水荷君大父  
歸骨於土矣間閱內典有得屬續不亂乾道丁亥二月  
戊子也年七十有二葬以十一月乙酉祔以夫人李氏  
四男子處仁秉義郎監江州甲仗庫處恭處雋為進士  
處厚早卒孫三人長膠也珙珪其季也孫女五人歸鎮  
江府錄事參軍張汲將仕郎王嗣宗進士黃廷佐處者  
二人曾孫瀛溉文舉名翥文舉之父曰安祖曰弼曾  
祖曰岫文舉嘗命於朝得初品官非其好也銘曰



武寧之東長湖之原文舉茲藏後將多賢

高侍郎夫人墓誌銘

余鄉歷陽有孝子曰高祚字子長故吏部侍郎江都公  
諱衛之子侍郎薨時子長尚幼凡子長學行卓然能自  
揭立不墜其家聲母夫人實教之也太夫人年高樂荆  
州之風土子長因家焉以太夫人之樂夫此也子長仕  
宦不敢復遠荊州以去蓋于武昌者六年于荊州者二  
年于沅州者二年自沅州罷歸太夫人於是七十有七

矣子長請于朝願奉祠祿以養閉門不復出荊州牙城  
之東有屋數十楹其傍鑿池植花竹築室其中子長夫  
婦日奉太夫人攜子若孫遊焉內外千指敬愛雍穆大  
夫士慕之者紀于歌詩凡稱事親皆於子長乎取法蓋  
如是者又二年而太夫人以疾不起子長歐血骨立親  
負土築墳葬之日有鶴飛鳴其上訖事乃去夫以太夫  
人享上壽具封邑康寧好德五福備具子長平時未嘗  
違膝下生也敬以養死也禮以葬於今之世可以無憾

而子長每言及太夫人涕泣輒隨之悲怨固極若未嘗  
一日得奉承其親者嗚乎終身之慕有若子長謂之孝  
者非耶太夫人諱靜明廬州梁縣人姓王氏年十有二  
歸高氏生三男子祐承務郎機修職郎前死季則子長  
也今為右朝請郎始侍郎公及與元祐諸公游嘉言懿  
行太夫人悉能記之侍郎為太平州判官攝州事山谷  
來為守謫久貧甚既入境矣復坐黨事免侍郎得堂帖  
不以告迎候如禮山谷既視印已乃知之侍郎為治歸

裝甚飭備過於久所事曾丞相子宣過郡下時公卷葬  
母事欲起部使者得風旨遣州都監圍其館脅之侍郎  
徒步往揮其衆曰此前宰相坐怨家曖昧事且白汝何  
敢爾且我攝州事事當關我即留館中不去丞相以安  
既獄具公卷猶坐貶丞相泣語諸子當事侍郎以父禮  
凡此皆子長不及知太夫人以告曰汝父不顧身以徇  
義汝宜勉之太夫人葬以其年十月十四日在江陵縣  
白湖龍山之原太夫人有三男孫塤塹塹三女孫銘曰

八十一年子孝以賢我銘實然龍山之阡

于湖集卷二十九